

## SOMMAIRE

RECIT DV PROCEZ PENDANT AV GRAND  
CONSEIL DV ROY,

Entre M. Salomon de Cattin, Prieur du Prieuré de S. Nicolas de Roussy, demandeur & complainant pour raison dudit Prieuré.

Contre M. Nicolas Couyer, & Pierre Frison, defendeur.



ES parties sont d'accord, Que le dernier paisible possesseur dudit prieuré a esté Messire Jean Aubert, Abbé de S. Jean de Laon.

Couyer dit, qu'il a vaqué par sa resignation.

Catin dit, qu'il a vaqué par sa mort en vertu de la regle de public. estant decedé en la possession, & est pourueu par le sieur Abbé de Marmoutier, en la collation duquel il est.

Frison dit, qu'il a vaqué par la nullité des tiltres & incapacité de Coyer.

Il faut examiner la resignation, car si elle subsiste, ledit Catin n'y peut rien pretendre : aussi si le benefice vaque par mort, ledit Catin est le seul titulaire.

Il resulte des pieces, que M. Jean Aubert passa procuration le 2. iour de Novembre 1621. pour resigner ledit prieuré, en faueur dudit Coyer, & qu'elle fut admise à Rome le 24. dudit mois, avec expression de deux choses, l'une, qu'il n'auoit que neuf ans, l'autre, qu'il estoit *ex viroque latere de nobili genere natus*.

Il pretend, qu'en vertu de ceste signature il a prins possession, sans qu'il apparaisse d'aucun acte possessoire : tellement que quand cet acte seroit valable en soy par la forme, ledit Aubert ayant continué sa possession iusqu'à sa mort, le benefice n'auroit delaisié de vaquer par sa mort, *quia non videtur factum quod non durat factum*, dit du Moulin, sur matiere en la regle de publ. num. 311.

La regle de publ. dit, que si le resignataire n'a prins possession, & icelle publiée en sorte, que le resignant apres six mois du iour de sa resignation admise, decede en la possession, *beneficium censetur vacare per obitum non per resignationem*.



Ce n'est pas assez de faire vn acte de prinse de possession bien escrit & bien publié, si le resignataire ne iouit effectiuement du benefice, s'il ne leue les fins, il illude la regle, & ce qu'il a fait est tenu pour non fait, & la regle veut que le benefice vaque par mort, tout ainsi que s'il n'auoit point esté resigné, ny la possession prinse.

Couyer a fait cela quand on tiendra sa possession valable, que non; car il n'a vn seul acte possessoire, ains vn acte de prinse de possession du 15. Octobre, & neantmoins ledit sieur Aubert auoit cinq iours auparauant fait vn bail de neuf ans, & plaidé en son nom depuis ledict bail, & fait vn bail emphyteotique depuis ledit bail.

Les quittances qu'il produict sont escritures priuées faites par son pere, qui en peut faire encores ce iourd'huy d'autres s'il veut, il faut des actes autentiques.

Quand on considerera que Couyer a gardé sa prouision trois ans, quoy que ce soit il ne s'en falloir que sept iours auparauant de prendre possession qu'il n'a fait aucun acte pour faire obliger les fermiers à luy; que Aubert a fait tous actes possessoires, depuis ledit acte de possession; l'on iugera bien qu'il est faux & antidaté.

La forme de l'acte le fera recognoistre faux, & nul, voicy quel il est, vn acte par lequel il dit qu'il prend possession dudit Prieuré le 25. Octobre 1623. lequel dit le Notaire, il publie, mais il faut sçauoir à qui il le publie, & comment?

Premierement il est certain que ce n'estoit vn iour de Dimanche, ains de Mercredy, partant il n'est publié au prosne de la parroisse, comme l'Ordonnance desire.

Secondement, Il est publié par vn Chanoine de Rheims, vn de Laon, & trois hommes de la ville de Paris, l'vn desquels n'a signé.

En troisieme lieu, c'est acte n'est insinué qu'apres la mort d'Aubert, *imo*, depuis le procez commencé, ce qu'il faut considerer.

L'art. 15. de l'Ordonnance 1550. interpretant la regle de public. donne plusieurs moyens pour publier les actes de prinse de possession des benefices, afin que si le temps ne permettoit la publication au prosne, l'on y puisse satisfaire, d'ailleurs elle dit premierement que la publication sera faite au prosne de la parroisse, où le benefice est situé.

Où aux places publiques, où aux Iurisdiccions, où aux sieges Royaux & presidiaux, où aux iours de marché, Couyer n'a tenu aucunes de ces formes: car il ne la publié en aucun lieu; encores qu'il luy fut facile de le faire, & au siege presidial de Laon, il estoit dedans la ville, au



3  
marché, il estoit ioignant le benefice. Bref, par tout.

La raison pourquoy c'est, qu'il eust fallu des tesmoins, & il n'en eust trouué vn seul qui eust voulu prester la main à la fausseté: ainsi il a esté contrainct de faire escrire vn acte qui ne fut iamais fait, & les tesmoins qu'il dit auoir esté presens à la publication, sont affectez, & l'acte quand il seroit veritable nul.

La publication est desirée par l'Ordonnance, & la regle de public. pour rendre l'acte cogneu & public, que nul ne puisse ignorer qui est le pourueu du benefice. L'on ne peut dire qu'il soit publié quand il n'y a vn seul homme du lieu du Prieuré. L'on a ramassé des noms pour fournir l'acte, non des personnes.

Est-ce publié à Rouffy quand deux hommes desirez, vn de Laon, vn de Rheims sont à ceste publication adioustez, que l'ordonnance veut que telle publication soit insinuee, elle ne l'est pas: c'est donc vn acte faux & nul: ainsi il n'a pas empesché que le benefice n'aye vaqué par la mort d'Aubert, il est tonsuré par autre que son Diocesain, par tant irregulier *Can. si quis ausus. 71. diuis.* & à ce moyen il n'y a point de replique.

La nullité est occulaire, pour ce qu'il n'auoit pas l'aage. Il s'est dit noble des deux costez, & iamais homme ne fut né de plus viles personnes, sa mere fille du Portier de sainte Geneuiefue, son pere Laquais en premiere qualité, & depuis Sommelier du sieur Aubert: voila ses qualitez.

Or c'est vne grande surprise & subreption au Pape, lequel donne plus facilement ses dispenses aux nobles & scauans, qu'à ceux qui n'ont aucune recommandation. Le concordat le monstre, qui donne des grandes prerogatiues aux nobles, & pour l'aage & pour tout le chap. *de multa de Preb. in.* fait autant. Il a doncques supposé vne qualité de noble de pere & de mere la prouision nulle *cap. super literis de rescript.*

Car il estoit incapable à neuf ans de reciter son Office, non seulement: mais de posseder vn Prieuré, comme dit Flaminus lib. 4. cap. 1. num. 7. il faut considerer qu'il est seul au prieuré, il fait du grand pour se conduire, & *indecorum est eos Ecclesiis presficere qui se ipsos gubernare non possunt cap. indecorum de atat.* & *qualit. presfici Coris in paraf. benef. cap. 3. pat. 1.*

Ainsi ioignant l'incapacité, la nullité du tiltre, la nullité de la prise de possession, nulle publication, nulle insinuation, il faut sans doute conclurre qu'il vaque par mort.



De ces moyens resulte la nullité du tiltre de Frison, pource que si le benefice n'a point subsisté en la personne de Couyer, il ne peut vacquer en sa personne.

Par ces moyens il conclud, à ce qu'il soit maintenu en la possession dudit Prieuré, avec despens, dommages, interests, & restitution de fruits.

*Monsieur Lanyer Rapporteur.*